

## **PARTIDA A TRESSETTE** **de Chicca Dessì**

Da ghi mama is cartas depet giare  
totus depeis faere atenzione  
chi non cheleis a os'imbroliare  
ca onni'orta faet matzigone.

Mancu chi hapet fattu una promissa  
sa carta de sutta depet cardiare  
chi est unu trese, si ddu chistit issa  
chi est frillu, ischit a chie ddu giare.

-Mancari meda non iscas giogare-  
narat babbu, ardiannodda a trotu  
-cricas onnia orta de collunare

ma cun deo no bintzes ettotu  
t'hapo orroschiu, non sigas a etare  
po nontesta bastat s'avvolotu-.

Paret de ddos biere custos duos betzos gioganno a cartas daenanti a su fogile: sa pobidda cricat de collunare e issu s'appruddat cun tottu ca apustis de una vida passada paris ognunu ischit de s'atteru pentzamentos e ideas. Fortzis su poeta chelet a nos si narrere ca comente immetzaus tottus torraus pipios e cheleus collunare in su giogu, ma su tempus non si faet collunare mancu dae is betzos.